



Zadnjih deset noći ramazana – trgovina uspješnih (Medina)

Hatib: dr. Husejn ibn Abdulaziz Alu Šejh

17. ramazan 1447. po Hidžri / 6. mart 2026.

Hvala Allahu Koji je Svoje robove uputio da Mu budu pokorni i Koji ih obasipa obilnim i velikim blagodatima. Svjedočim da nema istinskog boga osim Allaha, Jedinog, Koji nema sudruga, savršenog u Svojoj veličini i potpunosti, i svjedočim da je naš vjerovjesnik Muhammed, sallallahu alejhi ve sellem, Njegov rob i poslanik, najbolji među onima koji su klanjali i postili. Neka su Allahova milost, blagoslovi, spas na njega, na njegovu časnu porodicu i njegove plemenite ashabe.

O ljudi, bojte se Uzvišenog Allaha, pa će vam On podići stepene, oprostiti grijehe i umnogostručiti nagrade. Uzvišeni kaže: "A onome ko se Allaha boji, On će preko loših postupaka njegovih prijeći i nagradu mu veliku dati." (Et-Talak, 5)

Jedna od najvećih blagodat, kojom te Allah može obdariti, Allahov robe, jeste da dočekaš posljednjih deset dana ramazana. Tekstovi Kur'ana i sunneta ukazuju na njihovu veliku vrijednost i na uzvišen položaj ibadeta u tim noćima. To su noći koje je Plemeniti Gospodar posebno odlikovao Lejletul-kadrom – posebnom noći, velike vrijednosti i izuzetne počasti. Uzvišeni kaže: "Mi smo ga počeli objavljivati u Noći kadr, a šta ti misliš šta je Noć kadr? Noć kadr bolja je od hiljadu mjeseci." (El-Kadr, 1–3)

Zato je naš Poslanik, sallallahu alejhi ve sellem, u tim danima i noćima ulagao poseban trud u ibadetu, više nego u bilo kojem drugom vremenu. U vjerodostojnim predajama navodi se da je, kada bi nastupilo posljednjih deset dana ramazana, oživljavao noći ibadetom, budio svoju porodicu i još snažnije se posvećivao ibadetu.

Također je rekao: "Tražite Noć kadr u posljednjih deset noći ramazana", a u drugoj predaji: "Tražite je u neparnim noćima zadnje trećine." (Muttefekun alejhi)

Poslanik, sallallahu alejhi ve sellem, provodio je te dane u itikafu, tražeći Noć kadra.





Zato, o vjernici, iskoristite ovo vrijeme velikog dobitka i uspjeha. Ovi blagoslovljeni dani su malobrojni, pa nadoknadite ono što je prošlo od mjeseca ramazana i potrudite se da postignete njegove blagodati, čineći dobra djela i stječući sevape.

O muslimani, naš Gospodar je plemenit: ko se "osvijetli" Njegovom uputom – On ga uputi; ko Mu se iskreno obrati – On mu je dovoljan; ko pristane kod Njegovih vrata – On ga primi; a ko se od Njega udalji – On ga opet poziva. Zato se trudite u postizanju Njegovih dobara, natječite se u činjenju dobrih djela i iskreno se pokajte Gospodaru nebesa i Zemlje.

Poslanik, sallallahu alejhi ve sellem, rekao je: "Ko provede Noć kadr u namazu, vjerujući u Allaha i nadajući se Njegovoj nagradi, bit će mu oprosteni prethodni grijesi."

Zato, brate muslimanu, budi među onima koji se natječu u dobru s bogobožnima i čestitima. Ovo je mjesto trgovine dobrih ljudi, polje na kojem se sije bogobožnost za Dan vječnog ostanka, i prilika da se pripremi opskrba za putovanje koje nije poput drugih putovanja.

Koliki je samo gubitak onoga ko ove dane provede u nemaru i nebrizi, i kolika je propast onoga ko propusti ove božanske blagodati i posebne trenutke milosti.

Jednog dana Poslanik, sallallahu alejhi ve sellem, popeo se na minber i rekao: "Amin!" Ashabi su ga upitali zašto je to rekao, a on je odgovorio: "Došao mi je Džibril i rekao: 'Propao onaj ko dočeka ramazan, a ne bude mu oprošteno i ne uđe u Džennet. Reci: amin', pa sam rekao amin." (Hadis ima dobar lanac prenosilaca.)

Poslanik, sallallahu alejhi ve sellem, također je rekao: "U mjesecu ramazanu ima noć koja je bolja od hiljadu mjeseci. Kome bude uskraćeno njeno dobro, uskraćeno mu je svako dobro." U drugoj predaji stoji: "A njeno dobro uskraćeno je samo pravom gubitniku." (Hadis je vjerodostojan.)

Zato, vi koji imate visoke ciljeve i uzvišene težnje, tražite dobitke u ovim noćima koje nose nebrojene blagodati i neizmjerne počasti. Onaj ko zna šta želi postići, neće mu biti teško ono što na tom putu daje i žrtvuje.





Uzvišeni kaže: "I nastojte zaslužiti oprost Gospodara svoga i Džennet prostran kao nebesa i Zemlja, pripremljen za one koji se Allaha boje." (Ali Imran, 133)

O muslimani, ramazan je mjesec približavanja Allahu i mjesec ibadeta. Zato je pohvalno da se čovjek ne zaokuplja uređajima i sredstvima komunikacije tako da ga to odvraća od ciljeva namaza i posta. Štaviše, pokuđeno je i neprimjereno da se time bavi na mjestima ibadeta, jer su džamije sagrađene radi namaza, spominjanja Allaha i učenja Kur'ana.

Bojte se Allaha, o muslimani, jer takva zaokupljenost udaljava čovjeka od najvećih ciljeva ibadeta i najuzvišenije svrhe približavanja Allahu.

Uzvišeni kaže: "Eto toliko! Pa ko poštiva Allahove propise – znak je čestita srca." (El-Hadždž, 32)

"U džamijama koje se Allahovom voljom podižu i u kojima se spominje Njegovo ime – hvale Njega, ujutro i navečer." (En-Nur, 36)

Jedno od najvećih dobrih djela jeste često donositi salavat i selam na plemenitog Poslanika, sallallahu alejhi ve sellem.

Allahu, smiluj se, blagoslovi i spasi našeg vjerovjesnika Muhammeda, sallallahu alejhi ve sellem, njegovu porodicu i sve njegove ashabe. Allahu, oprosti muslimanima i muslimankama, živima i umrlima. Allahu, podari nam dobro na ovom svijetu i dobro na ahiretu, i sačuvaj nas patnje u Vatri.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

